

共同經課-1 以賽亞書五十五章四節～九節 a

4 主耶和華賞賜我受教示 ê 舌，hō 我知怎樣用言語扶助厭倦 ê 人；主 tak 早起叫醒，叫醒我 ê 耳孔，hō 我能聽，親像受教示 ê 人一樣。5 主耶和華開通我 ê 耳孔，我並無違逆，亦無退後。6 人 phah 我 ê ka-chiah-phiaⁿ，我 chhut-chāi 伊 phah；人 chhoah 我嘴 phoé ê 嘴鬚，我 chhut-chāi 伊 chhoah；人凌辱我，kā 我 phùi-noā，我亦無掩面。7 因為主耶和華的確幫贊我，所以我無見笑；為 tiòh án-ni，我 hō 我 ê 面硬親像 tēng 石；我亦知我的確無致到漏氣。8 稱我做義 ê 近 lah；chī-chūi kap 我相爭？伊 thang kap 我相 kap khiā；chī-chūi 做我 ê 對敵？伊 thang 就近我。9 看 ah，主耶和華 beh 幫贊我，chī-chūi 能定我有罪 ah？

共同經課-2 詩篇三十一篇九節～十六節

9 耶和華 ah，我 tī 患難中，求你憐憫我；我 ê 目矚因為憂悶 phah-pháiⁿ，我 ê 心神，我 ê 身體，亦是 án-ni。10 我 ê 性命因為憂苦來消無，我 ê 年歲為 tiòh 吐氣亦 án-ni；我 ê 氣力因為我 ê 罪惡來衰 lám；我 ê 骨頭亦枯焦。11 我因為我一切 ê 對敵成做凌辱；Tī 我 ê 厝邊 tau koh-khah 傷重；hiah-ê bat 我 ê 人 lóng 驚我；Tī 外面看見我 ê 人走閃離開我。12 我親像死人 hō 人 boē 記得，無人 siàu 念；我親像破碎 ê 器具。13 因為我聽見 choē-choē 人 ê 譏謗，四圍 lóng 是驚惶；In 相 kap 參詳攻擊我 ê 時，就計謀 beh 害我 ê 性命。14 耶和華 ah，我猶原 oá 靠你；我講，你是我 ê 上帝。15 我 ê 遭遇 tī 你 ê 手；求你救我脫離我 ê 對敵 ê 手，以及窘迫我 ê 人。16 求你 hō 你 ê 面照光你 ê 奴僕；照你 ê 慈愛拯救我。

共同經課-3 腓立比書二章五節～十一節

5 Lín tiòh 有基督耶穌 ê 心做心；6 伊本有上帝 ê 形狀，無掠 kap 上帝平等做所 tiòh 執守 ê，7 反 túg piàⁿ 空家己，取奴僕 ê 形狀，成做人 ê 樣相；8 已經有親像人 ê 款式，就屈家己，順服到 tī 死，甚至死 tī 十字架。9 所以上帝高升伊極高，賞賜伊 hit-ê 名，poāⁿ 過 tī 萬名 ê 頂面 ê；10 hō 見若 tī 天，tī 地，kap tī 地下 ê，tī 耶穌 ê 名，無一個腳頭 u m 跪拜，11 無一個嘴 m 稱呼耶穌基督做主，來歸榮光父上帝。

共同經課-4 馬可福音十五章一節～三十九節

1 到天光，hiah-ê 祭司頭、長老、經學士 kap 全公會 saⁿ-kap 議論，縛耶穌，帶伊去，交 hō 彼拉多。2 彼拉多問伊講，你是猶太人 ê 王 mah？伊應講，你講，就是。3 祭司頭用 choē-choē 項告伊。4 彼拉多 koh 問伊講，你 lóng 無應 mah？你看，in 告你 hiah choē 項。5 但是耶穌 iáu-kú 無應；致到彼拉多奇怪。6 到節期，總督 éng 有放一個犯人 hō in，照 in 所求 ê。7 有一人，名巴拉巴，kap hiah-ê 作亂 ê 人同受縛，in tī 作亂 ê 時 bat thài 死人。8 眾人就起去，求彼拉多照常來行。9 彼拉多應講，Lín ài 我放猶太人 ê 王 hō lín mah？10 因為知 hiah-ê 祭司頭是為 tiòh 怨妒，chiah 解送伊。11 但是 hiah-ê 祭司頭使唆眾人，寧可求放巴拉巴 hō in。12 彼拉多 koh 應講，Án-ni 就 lín 所叫做猶太人 ê 王 ê，我 tiòh 怎樣辦伊？13 In koh 喉叫講，釘伊 tī 十字架。14 彼拉多 kā in 講，怎樣 ah，伊做甚麼 pháíⁿ？總是 in ná 大聲喉叫講，釘伊 tī 十字架。15 彼拉多因為 ài hō 眾人歡喜，就放巴拉巴 hō in；已經鞭 phah 耶穌，就發交去釘十字架。16 兵丁拖伊入院內，就是公堂，就會齊 thong 營，17 用紫色 ê 袍 hō 伊穿，koh 編刺 á ê 冕旒 kā 伊戴，18 就 kā 伊請安，講，猶太人 ê 王，平安！19 Koh 用蘆竹 sut 伊 ê 頭殼，kā 伊 phùi-noā，跪落拜伊。20 戲弄 soah，hit 領紫色 ê 袍就 kā 伊 thng 起來，將伊家己 ê 衫 kā 伊穿落去；帶伊出，beh 釘伊十字架。21 有 Kó-tī-nāi 人西門，就是亞力山大 kap Ló-hu ê 老父，tùi 山場來 àn hia 過，in 勉強伊 saⁿ-kap 去，來 giá 耶穌 ê 十字架。22 In 帶耶穌到各他 ê 所在，翻譯就是頭殼碗 ê 所在；23 用 kiáu 沒藥 ê 酒 hō 伊；耶穌 m 受。24 就釘伊 tī 十字架，pun 伊 ê 衣服，liam-khau 看甚麼人得 tiòh 甚麼。25 Hit 時九點鐘，就釘伊 tī 十字架。26 用斬條寫伊 ê 罪狀，講，猶太人 ê 王。27 也有兩個賊 kap 伊同釘十字架，一個 tī chiáⁿ-pêng，一個 tī tò-pêng。28.29 經過 ê 人褻瀆伊，搖頭講，Āi ah，你毀壞殿，三日起伊 ê，30 taⁿ tiòh 救家己，tùi 十字架落來。31 Hiah-ê 祭司頭 kap 經學士也是 án-ni 恥笑伊，saⁿ-kap 講，伊 bat 救別人，也 boē 會救家己。32 以色列 ê 王基督 taⁿ tiòh tùi 十字架落來 hō 阮看來信伊。同釘 tī 十字架 ê 也罵伊。33 日中晝全地烏暗，到三點鐘 ê 時；34 三點鐘 ê 時，耶穌大聲叫講，Í-lò-i，Í-lò-i，liáp-ma2sat-pak-tāi-ní，翻譯就是，我 ê 上帝，我 ê 上帝，你啥事放離我。35 邊頭 khiā ê 有人聽見，就講，你看，伊 teh 叫以利亞。36 有一人走去用海絨浸醋，hā tī 蘆竹 á 尾，hō 伊 suh，講，且慢，試看以利亞來救伊落來 á 無。37 耶穌大聲叫，氣就斷。38 殿內 ê 帳籬 tùi 頂到下裂做兩 pêng。39 百總 khiā tī 耶穌 ê 對面，看見伊 án-ni 氣斷，就講，Chit 人真正是上帝 ê Kiaⁿ。